

26 January. 2026

समे .18:15 Hrs

<><><><><><>

### Headlines

- कर्तव्य पथ नमीं दिल्ली च गणतंत्र दिवस दा राष्ट्री स्तर दा समारोह होआ जेदे च भारत दी सांस्कृतिक बन-सबन्नता ते सैनिक शक्ति दा शानदार प्रदर्शन कीता गेआ।
- उप-राज्यपाल मनोज सिन्हा होरें गणतंत्र दिवस समारोह च राष्ट्री झंडा फहराया।
- रक्षा मंत्री होरें प्रधानमंत्री नरेंद्र मोदी हुं'दे नेतृत्व च देश दी जनता पर केंद्रित गणतंत्र दे तौर पर भारत दी यात्रा दी सराहना कीती।
- पूरी जम्मू डिविजन च गणतंत्र दिवस समारोहें दा आयोजन कीता गेआ, कठुआ च मंत्री सतीश शर्मा ते पुंछ च जावेद राणा होरें राष्ट्री झंडा फहराया।

<><><><><><>

### Republic

अज्ज पूरा देश 77मां गणतंत्र दिवस मना'रदा ऐ। राष्ट्रपति द्रोपदी मुर्मू होरें नमीं दिल्ली च कर्तव्य पथ थमां गणतंत्र दिवस समारोह दा नेतृत्व कीता। समारोह दा शुभारम्भ प्रधानमंत्री नरेंद्र मोदी हुं'दे राष्ट्री युद्ध स्मारक दे दर्शन कन्नै होआ जित्थे उनें शहीदें गी फुल्ल अर्पित करी श्रद्धांजलि दित्ती। राष्ट्रपति द्रोपदी मुर्मू, परेड दे मुख परौहने यूरोपीय-परिशद दे अध्यक्ष एंटोनियो कोस्ता ते यूरोपीय आयोग दे अध्यक्ष उरसुला वान डेरलेयन उप्पर पुजियां। राष्ट्री तिरंगा फहराया गेआ जेदे मगरा 21 तोपें दी सलामी कन्नै राष्ट्रगान गाया गेआ। राष्ट्रपति होरें भारती हवाई सेना दे ग्रुप कैप्टन शुभांशु शुक्ला होरें गी भारत दे सर्वोच्च शांतिकालीन वीरता पुरस्कार अशोक चक्र कन्नै सम्मानित कीता। अज्ज कर्तव्य पथ पर आयोजित गणतंत्र दिवस परेड नै भारत दी सांस्कृतिक बन-सबन्नता ते सैन्य शक्ति दे बेमिसाल संगम गी प्रदर्शित कीता। इस बरे दा विशे स्वतंत्रता का मंत्र वंदे मातरम ते समृद्धि का मंत्र आत्मनिर्भर भारत हा। परेड दरान बक्ख-बक्ख केंद्र शासित प्रदेशें ते केंद्री सरकारी मंत्रालय ते विभागें दियां 30 झांकियां प्रदर्शित कीतियां गेइयां। जिनें राष्ट्री गीत वंदे मातरम दे 150 बरे ते बक्ख-बक्ख खेत्तरें च बदधी आत्मनिर्भरता दे बल उप्पर देश दी तेज गति दे शानदार मेल गी प्रदर्शित कीता।

<><><><><><>

### R'Day LG

उप-राज्यपाल मनोज सिन्हा होरें अज्ज 77 में गणतंत्र दिवस उप्पर बडुलै जम्मू दे एम.ए स्टेडियम च आयोजित केंद्र शासित प्रदेश स्तरीय समारोह च तिरंगा झंडा फहराया। उनें परेड दी सलामी लैती। मार्चपास्ट च सेना, बीएसएफ, सी.आर.पी.एफ, एसएसबी, जम्मू-कश्मीर पुलस, साबका सैनिकें, एनसीसी बक्ख-बक्ख स्कूलें ते ब्रास ते पाइप बैंड टुकडियें शानदार प्रदर्शन कीता। इस समारोह च झांकियें राएं जम्मू-कश्मीर दी विकासशील ते सांस्कृतिक भावना दा प्रदर्शन कीता गेदा हा। प्रमुख विशे च आपरेशन सिंदूर, मिशन युवा, शिडक सुरक्षा,

नशामुक्त जम्मू-कश्मीर, श्रम को सम्मान, सरल कर सशक्त भारत ते खाद्य सुरक्षा शामिल हे। जम्मू-कश्मीर दे बहादुर वीरें आसेआ पेश कीते दे प्रभावशाली मोटरसाइकिल कर्तव्यें ते केंद्र शासित प्रदेश दी सगोसार विरासत गी दर्शाने आहली बक्ख-बक्ख सांस्कृतिक प्रस्तुतियें दर्शकें दा मन मोही लैती। अपने संबोधन च उपराज्यपाल होरें गणतंत्र दिवस दियां सभनें गी मुबारकबाद दिती ते लोकतंत्र एकता ते राश्ट्री अखंडता दी नीहू दी रूप च भारती संविधान दे महत्व उप्पर लोऽ पाई। उनें आखेआ

मुख्यमंत्री उमर अब्दुल्ला होर इस मौके पर मुख् परौहने हे। साबका मुख्यमंत्री फारूक अब्दुल्ला, स्पीकर अब्दुल रहीम राथर, विपक्षी पार्टी दे नेता सुनील शर्मा , एम.एल., बक्ख-बक्ख पुलस अधिकारिएं सने होर केइयें लोक समारोह च शामिल होए।

<><><><><><>

### GST-Reforms

जम्मू-कश्मीर राज्य कर विभाग आसेआ जम्मू दे एम.ए स्टेडियम च 77में गणतंत्र दिवस परेड दरान पेश झांकी नै जीएसटी सुधार दुआ गेड नागरिकें लेई लाहू विशे तैहत जीएसटी सुधार दे दुए गेड गी बडे शैल सनाहकडे ढंगै कन्नै पेश कीता। इस प्रदर्शन नै केंद्र शासित प्रदेश स्तर पर वस्तु ते सेवा कर जीएसटी सुधारें दे परिवर्तनकारी प्रभावें गी उजागर कीता जेह्दे च सखल्ली कर प्रणाली ते घट्टु स्लैबें पर विशेष ध्यान केंद्रित कीता गेआ जेदे कन्नै आम माहनु गी जरूरी सेवां ते वस्तुएं उप्पर टैक्स दे भार च कमी गी प्रदर्शित करदे होई झांकी नै दस्सेआ जे कियां इनें प्रगतिशील बदलावें दे राएं परिवारें उप्पर वित्तीय दबाऽ घट्टु कीता गेआ ऐ। पारदर्शिता गी बढ़ावा दित्ता गेआ ते आर्थिक विकास होआ ते जम्मू-कश्मीर च पूरे-पराते विकास गी गति दिती।

<><><><><><>

### JK Award

जम्मू-कश्मीर सरकार नै तारें गणतंत्र दिवस 2026 गितै जम्मू-कश्मीर सरकार पुरस्कार -2026 पाने आलें दे नाएं दी घोषणा कीती ऐ। ए पुरस्कार बहादुरी- साहित्य- कला- लोक सेवा- खेडुं- मीडिया- सामाजिक सुधार ते उद्यमता दे क्षेत्र च विरला योगदान देने आस्तै दिते जंदे ना। बहादुरी आस्तै ए पुरस्कार मरणोपरांत हपतनार-पहलगाम दे आदिल हुसैन शाह गी दित्ता जा रदा ऐ। उनेंगी इक लक्ख दा नकद ईनाम ते प्रशस्ति पत्र दित्ता जागा। जम्मू थमां PSI निखिल कुमार गी बी बहादुरी पुरस्कार दित्ता जा रदा ऐ- जेदे च 51 जहार रुपए ते प्रशस्ति पत्र शामिल ऐ। 6 साहित्यकारें गी बी सम्मानित कित्ता जा रदा ऐ। इंदे च यशपाल निर्मल होरें गी डोगरी च- चौधरी हसन परवाज़ होरें गी गोजरी च परवेज़ मानूस होरें गी पहाड़ी च ए पुरस्कार दित्ता जा रदा ऐ। कवि फयाज़ दिलबर जिनेंगी मरणोपरांत ए सम्मान दित्ता जाहगा। केवल कृष्ण शर्मा ते रतन लाल शर्मा होर बी पुरस्कार पाने आलें च शामिल ना। सरकार दा आक्खना ऐ जे ए सम्मान जम्मू-कश्मीर च बक्ख-बक्ख क्षेत्रें च अमूल्लें योगदान ते समाज सेवा आस्तै दित्ता जंदा ऐ।

<><><><><><>

### IMD

भारती मौसम विभाग नै जम्मू-कश्मीर लद्दाख ते हिमाचल प्रदेश च कल्ला थमां भारी बरखा पौने दी पेशनगोई कीती ऐ। मौसम विभाग नै दिल्ली, हरियाणा, चंडीगढ़ ते पंजाब च अगले 3 दिन सीत लैहर चलने ते घनी धुंध पौने दे असार दस्से ना।

<><><><><><>

### Rajnath

रक्षा मंत्री राजनाथ सिंह होरें आखेआ ऐ जे भारत इक जन केंद्रित गणराज्य ऐ जित्थे लोकतंत्र ना छड़ा जनता दा ते जनता आसेआ ऐ, सगुआं जनता लेई बी ऐ। इक अंग्रेजी दैनिक लेई लेख लिखदे होई मंत्री होरें आखेआ जे एक लोकतांत्रिक गणराज्य दी वास्तविकता इस गल्ला उप्पर मापी जंदी ऐ जे राज्य किन्नी निश्ठा कन्नै अपनी जनता दी सेवा करदा ऐ। रक्षा मंत्री होरें आखेआ जे जनता दी सेवा कदें नेई खत्म होने आहली प्रतिबद्धता ते लगातार चलने आहली प्रक्रिया ऐ। अपने इस लेख दे राएं रक्षा मंत्री होरें प्रधानमंत्री नरेंद्र मोदी हुंदे नेतृत्व च भारत दी यात्रा पर लोऽ पाई। उनें सभनें लोकें गी अपनी शुभकामनां दित्तियां।

<><><><><><>

### R'Day Jammu

देश दे होरनें हिस्सें आडर 77मां गणतंत्र दिवस पूरी जम्मू डिविजन च देशभक्ति दी भावना कन्नै मनाया गेआ। कठुआ-किश्तवाड़ दी बर्फु कन्नै भरोची दी प्हाड़िएं शा लेइयै जम्मू ते साम्बा दे मैदानी इलाकें तगर गणतंत्र दिवस समारोह बड़े उत्साह कन्नै मनाया गेआ।

<><><><><><>

### Kathua

कठुआ च मुख्ख समारोह जिला खेड्डू स्टेडियम च होआ जित्थे कैबिनेट मंत्री सतीश शर्मा होरें राश्ट्री झंडा चाढ़ेआ ते परेड दी सलामी लैती। परेड च पुलिस, अर्धसैनिक बलें, एन.सी.सी ते विद्यार्थियें दे 43 दस्तें हिस्सा लैता। अपने भाशण च मंत्री सतीश शर्मा होरें राज्य सरकार दी उपलब्धिएं गी उजागर कीता ते राज्य च सोलर ते बाँयोटेक पार्क विकसित करने दी घोशणा कीती। उनें पैहली प्राती कॉमन वेल्थ, खो-खो गेम्स दी मेजबानी करने दी घोशणा बी कीती।

<><><><><><>

### Samba

साम्बा च मुख्ख समारोह रानी सुचेत सिंह खेड्डू स्टेडियम अराजी साम्बा च होआ जित्थे जिला विकास कौंसल दे प्रधान केशव दत्त शर्मा होरें तिरंगा झंडा चाढ़ेआ ते परेड दी सलामी लैती। मार्च पास्ट च कोई 25 दस्तें हिस्सा लैता। समारोह च विद्यार्थियें आसेआ सांस्कृतिक कार्यक्रम पेश कीते गए। डी.डी.सी प्रधान होरें इस मौके पर लोकें गी संबोधित कीता।

<><><><><><>

### Reasi

रियासी जिले च मुख्ख समारोह जनरल जोरावर सिंह खेड्डू स्टेडियम च होआ। देशभक्ति दे जज्बे कन्नै सराबोर समारोह च डी.डी.सी प्रधान होरें तिरंगा झंडा चाढेआ ते शानदार मार्च पास्ट दी सलामी लैती। परेड च पुलिस, सुरक्षाबलें. एन.सी.सी ते स्कूलें दे विद्यार्थिं दे दस्ते शामिल होए।

<><><><><><>

### Poonch

पुंछ जिले च मुख्ख समारोह खेड्डू स्टेडियम च होआ जित्थे जल शक्ति ते जंगलात दे मंत्री जावेद राणा होरें राश्ट्री झंडा चाढेआ ते परेड दी सलामी लैती। परेड च जे.के.ए.पी, जिला पुलिस, सी.आर.पी.एफ ते विद्यार्थिं दे 28 दस्तें हिस्सा लैता। अपने भाशण च मंत्री होरें पुंछ दे लोकें गी गणतंत्र दिवस दियां शुभकामनां दित्तियां ते देश दी स्वतंत्रता लेई बलिदान देने आहले स्वतंत्रता सेनानिं गी श्रद्धांजलि भेंट कीती।

<><><><><><>

### Udhampur

उधमपुर च गणतंत्र दिवस दा मुख्ख समारोह गौरमेंट पी.जी कॉलेज बाँयज च होआ जित्थे जिला विकास कौंसल दे प्रधान लाल चंद होर मुख्ख परौहने हे ते उनें बडुलै 9 बज्जियै 55 मिंट पर राश्ट्री झंडा चाढेआ ते परेड दी सलामी लैती। शानदार परेड च सी.आर.पी.एफ, एस.के.पी.ए, वालंटियर होमगार्ड, जिला पुलस ते एनसीसी दे दस्तें दे अलावा पुलस बैंड नै हिस्सा लैता। जिला कौंसल दे प्रधान होरें अपने संबोधन च गणतंत्र दिवस दी शुभकामनां दित्तियां ते अपने कम्मकाज दी उपलब्धियें गी उजागर कीता।

<><><><><><>

### Ramban

रामबन च गणतंत्र दिवस दा मुख्ख समारोह जिला पुलस लाइन च होआ जित्थे रामबन दी जिला विकास कौंसल दे अध्यक्ष डॉ. शमशाद खान होरें तिरंगा झंडा चाढेआ जेदे मगरा राश्ट्री गान गाया गेआ। 77मां गणतंत्र दिवस समारोह देशभक्ति दी भावना ते जज्बे कन्नै सम्पन्न होआ। डी.डी.सी प्रधान होरें जिला प्रशासन आसेआ विकास कम्में गी कामयाबी कन्नै लागू करने लेई सराहना कीती ते रामबन जिले दे लोकें दा धन्नवाद कीता जिनें सदा शांति ते भाईचारा कायम करने च सहयोग कीता ऐ।

<><><><><><>

### Rajouri

राजौरी च मुख्ख समारोह जिला पुलस लाइन च होआ जित्थे जिला विकास कौंसल दे प्रधान नसीम लियाकत होर मुख्ख परौहने हे, जिनें राश्ट्री झंडा चाढेआ ते सी.आर.पी.एफ, होम गार्ड, जिला पुलस, एनसीसी ते पुलिस बैंड दे दस्तें आसेआ कडु गेदे शानदार मार्च पास्ट दी सलामी लैती। डीडीसी प्रधान होरें अपने संबोधन च आखेआ जे 26 जनवरी 1950 गी भारत दा संविधान लागू होआ हा ते एह संविधान देश दे हर इक नागरिक गी मौलिक अधिकार उपलब्ध करांदा ऐ।

<><><><><><>

### Kishtwar

किश्तवाड़ च जिला स्तर दा गणतंत्र दिवस समारोह राष्ट्री एकता ते देशभक्ति दी भावना कन्नै होआ। जिला विकास कौंसल दियां अध्यक्ष पूजा ठाकुर होरें राष्ट्री झंडा चाढ़ेआ ते परेड दी सलामी लैती। किश्तवाड़ दे डिप्टी कमिशनर, एस.एस.पी ते कई दुए सीनियर अधिकारी इस मौके पर मौजूद हे।

<><><><><><>

## Doda

डोडा जिले च मुख समरोह खेड्डु स्टेडियम च होआ जित्थे जिला विकास कौंसल दे अध्यक्ष धनंतर सिंह होरें राष्ट्री झंडा चाढ़ेआ ते रस्मी मार्च पास्ट दी सलामी लैती।

<><><><><><>